

11/02/1997

Penunggang motosikal perlu hapus sifat berlumba

KUALA LUMPUR, Isnin - Pengguna jalan raya di negara ini perlu mengubah sikap dan mematuhi peraturan lalu lintas bagi mengelakkan kemalangan akibat kecuaiian sendiri.

Tinjauan Berita Harian mendapati kebanyakan orang ramai yang ditemui meminta pengguna jalan raya khususnya penunggang motosikal supaya tidak mementingkan diri sendiri dan lebih prihatin terhadap keselamatan lalu lintas.

Mohd Saiful Bahari, 21, berkata pengguna kenderaan terutama penunggang motosikal perlu berhati-hati ketika memandu dan tidak menjadikan jalan raya sebagai gelanggang berlumba.

"Kebanyakan kemalangan jalan raya di negara ini membabitkan penunggang motosikal yang sering menggunakan jalan raya sebagai tempat untuk berlumba atau melepaskan tekanan perasaan."

"Jangan jadikan pengguna jalan raya lain sebagai mangsa akibat kecuaiian kita sendiri terutamanya pada musim perayaan ini," katanya, di sini hari ini.

Beliau yang menunggang motor, berkata orang ramai perlu mengambil iktibar daripada tragedi jalan raya yang sering dilaporkan di akhbar supaya tidak menimpa diri masing-masing.

Semalam, Datuk Seri Dr Mahathir Mohamad melahirkan kekesalan terhadap sikap sesetengah pengguna jalan raya yang tidak mematuhi peraturan walaupun pihak berkuasa telah mengambil langkah serius untuk mengurangkan kadar kemalangan.

Perdana Menteri berkata, peraturan jalan raya yang sedia ada adalah untuk kebaikan pengguna sendiri dan kerajaan tidak boleh membuat apa-apa lagi sekiranya pengguna, khususnya penunggang motosikal enggan mematuhi peraturan berkenaan.

Media massa melaporkan jumlah kemalangan maut yang terus meningkat setiap hari terutamanya pada musim perayaan. Sehingga Sabtu lalu, 5,352 kemalangan berlaku di seluruh negara yang membabitkan 143 pengguna jalan raya terkorban.

Kecuaian penunggang motosikal seringkali dikaitkan dengan kemalangan pengguna jalan raya lain. Kedegilan pemandu mematuhi isyarat lalu lintas dan memandu secara berbahaya adalah antara punca kemalangan.

Seorang lagi penunggang motosikal, Farista Mustafa, 23, mengakui penunggang motosikal adalah pengguna jalan raya yang paling terdedah kepada bahaya.

Beliau yang berasal dari Johor berkata, kebanyakan penunggang motosikal yang menjadikan jalan raya khususnya malam minggu untuk berlumba secara haram di sekitar ibu kota sering terbabit dalam kemalangan.

"Kebanyakan penunggang motosikal yang mengikuti lumba haram di sekitar ibu kota selalu terbabit dalam kemalangan akibat kecuaiian diri sendiri. Zulkifli Abdul Ghani, 37 dari Pelabuhan Klang, berkata sikap pengguna jalan raya yang tidak mengendahkan kepentingan orang lain menjadi punca utama sesuatu kemalangan."

"Kebanyakan pemandu atau penunggang yang tidak mengendahkan keselamatan pengguna jalan raya lain hingga mengakibatkan kemalangan. Sikap mereka yang selalu hendak cepat dan tergopoh-gapah, kejar apa entah."

"Semua pengguna tidak kira siapa mereka perlu mengubah sikap dan memikirkan keselamatan orang lain supaya dapat mengelakkan kejadian yang tidak diinginkan, khususnya pada musim perayaan ini," katanya.

(END)